

Date – 27/09/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

- 1. Commonwealth Parliamentary Association, India Region Zone -III Annual Conference vawi 21-na Aizawl a neih tur hmanpui turin vawiin khan Lok Sabha Speaker Om Birla chuan Aizawl a rawn thleng.**
- 2. Swachhata Hi Seva kalpui mekah vawiin hi Hmarchak huamchhung bik tan nasa lehzuat a beihpui thlak ni- Mega day a nih angin Mizoram NSS-te chuan hmun hrang hrangah faina beihpui an thlak.**
- 3. Rampuma thingphun beihpui Ek Ped Maa Ke Naam-ah thing tiak vaibelchhe 80 chuang phun tawh a ni.**
- 4. Vice President Jagdeep Dhankar chuan Tourism chuan mihringte min thlunzawm a ni a ti.**

<><><>

COMMONWEALTH PARLIAMENTARY ASSOCIATION

Lok Sabha Speaker Om Birla in House inrelbawlina tha takah kalpui kawngah Mizoram Legislative Assembly chu an entawn tlak hle a ti a, Inhnialna leh sawihona hrisel neihna hmunah House chu hman chhunzawm zel turin a chah.

Vawiin khan Mizoram Legislative Assembly Session Hall-ah Commonwealth Parliamentary Association (CPA), India Region, Region Zone - III te chuan Annual Conference vawi 21 na hmangin, Plenary Session an nei a. CPA India Regional Chairman, Lok Sabha Speaker ni bawk Pu Om Birla leh Rajya Sabha Dy Chairman Pu Harivansh Narayan Singh ten an rawn telpui. Chief Minister Pu Lalduhoma pawhin a hawna inkhawm hi a telpui a ni.

India Regional Chairman Lok Sabha Speaker Om Birla chuan hmarchhak bialin hmasawna rahbi thar a rap chho mek chu lawmawm a tih thu sawiin State zawng zawng te chu rel kawnga thlun zawm vek a tul hle a ti a, India rama sumdawna rawn ti duh an tam tih sawiin hmarchhak bialah nasa zawka sumdawna kalpui theih ani tih sawiin inkalpawhna kawng tha lehzuat se chak zawkin hmasawna kalpui theih a ni dawn tih a sawi.

Lok Sabha Speaker chuan Democracy tichaktu chu ngaihdan hrang hrang a ni a ti a, ngaihdan inanglo sawiho thin chuan dan tha leh ngaihtuahna tha zawk bakah hmasawna a siam thin tih a sawi.

Chief Minister Pu Lalduhoma chuan Ram dan chu dan siamtuten rilru thianghlim, langtlang leh mipuite thatna tura an siam a ni tih an hriat phawt chuan tha taka zawm turin mipuite hi an inpeih mai thin a a ti a, Commonwealth Parliamentary Association chuan tawnhriat inhrilh kawngah zirtirna tha tak pe theuh se a duh tih sawiin rorelna ruhrel tichak zualtu leh inpawhna thuk zawk neih nan hmang theuh turin kalkhawmte a ngen a ni.

CPA India Region bik hian India rama Legislature 31 te a thlung khawm a. India Region hi Region Zone paliah an then a, vawiina conference hmang mek Region Zone - 3 hian Assam, Arunachal Pradesh, Manipur, Meghalaya, Mizoram, Nagaland, Sikkim, Tripura (8 Branches) te a huam a ni.

<><><>

LS SPEAKER PRESS CONFERENCE

Lok Sabha Speaker Om Birla chuan State hrang hrangin Assembly thutkhawm an neih chin tur bithliah zat dan anga awm sa chu an zawm tur a ni a ti a, Assembly neih zat tur a tlem ber anga duan zat tal zawm vek a pawimawh tih a sawi.

He thu hi vawiina Assembly Annex Committee Room-a thuthar thehdarhtute a kawmna ah sawiin Om Birla chuan State Assembly thutkhawm zat tura duan dan awmsa chu state tin ten an ngaih pawimawh a ngai a ti a, State tina Legislators te pawhin tunlai thiamna hman tangkaiin hmun dang te nen inpawh tlang taka awm theih nan hmang tangkai turin a duh a ti a, state tin ten midangte thiltha tih leh kalphung tha anlo neih zir nan tunlai thiamna chu state tina Assembly member ten hmang tangkai turin a duh tih a sawi.

Lok Sabha Speaker chuan Commonwealth Parliamentary Association thutkhawmah langtlang zawka State tina Assembly te hmalakna mipui hnena a thlen theih dan tur chungchang sawi ani dawn ati a, House tihdan phung leh kal hmang mipuite hriattur chu mi tinin an hriat theih nan hmalak ani dawn tih a sawi.

Om Birla chuan Mizoramah leh hmarchhak state hrang hrangah hmasawn theihna hrang hrang a awm tih sawiin thlai chin leh kutkawih eizawna bultan kawngah theihna hrang hrang a awm a ti a, thutkhawm chhungin state tinin inpawh takin hmasawna chungchang an sawi dawn a ti bawk.

Lok Sabha Speaker hian vawiin chawhma khan Mizoram Legislative Assembly Library-a Archive Cell thar a hawng a,

Archive Cell, Mizoram Legislative Assembly Library a hawn thar hi Mizoram Assembly Speaker Pu Lalbiakzama hmalakna-in Mizoram Legislative Assembly sum remchang ang ang te pawh khawma siam a ni. Document hlui pawimawh tak tak, District Council hunlai a mi te dah khawm

niin uluk taka vawn a ni tawh dawn a. Mamawh hunah awlsam taka hman leh bih theih tura vawn thatna tur pindan a ni.

<><><>

HINDI DIWAS

Akashvani Aizawl buatsaihin vawiin khan Hindi Diwas pualin Hindi Fortnight kharna hun hman a ni.

Akashvani Aizawl Multipurpose Hall-a Hindi Fortnight kharna huna hman ah hian Akashvani Aizawl Director leh Mizoram Cluster Head Pu DR Lalropuia chuan India rama cheng Mizote tan India ram neitu an ni tih ngamna thinlung pu tur chuan Hindi thiam a ngai a ni, a ti a, kalkhawm te chu inpawh tlang leh hlim taka hun hmang turin a chah a ni.

Doordarshan Aizawl Director News Nampibou Marinmai pawhin Hindi pawimawhzia uar takin a sawi a. Ram chhung hmun dangah hnathawk turin thalai an chhuak fova, harsatna an tawh len ber chu Hindi tawng a ni, a ti a. India ramah chuan englai pawhin a pawimawh reng dawn a, tawng thiam tan chuan khawi hmunah pawh Mizo thalaite tan hna hmuh a harsa ngailo, a ti. Tawng hi a ruka thiam chi a ni lo a, hman tama thiam chi a nih avangin an theih ang anga hmang tam turin Director chuan kawlkhawmte a chah a ni.

Vawiina hun hmanah hian recitation, zai leh incheina hmanga intihsiakna awmin hun hlimawm tak hman a ni.

<><><>

MSME CONFERENCE

Commerce and Industries Minister Pu F.Rodingliana'n kutkawih eizawna bultan tur te puihna tur sum budget ah dah ani a ti a, sumchang thlai Aieng, Sawhthing leh Hmarcha chingtu te tan ruahhmanna felfai tak siam a ni a ti.

He thu hi vawiina I&PR Auditorium-a International Conference on MSMEs in North East buatsaih a hmanpui na ah sawiin Minister chuan Mizoram sawrkar chu kutkawih eizawna bultan tur tan a inhawng zau a ti a, Bana Kaih policy hnuaiah thalai eizawna bultan duh te tan kawng hrang hrang hmachhawp siam ani tih sawiin sawrkarin puih a inhuam reng a ti a, tanpuina tur budget ah dah ani tih a sawi.

Pu F.Rodingliana chuan Mizoram chu Agro-based leh Horticulture based industries tan theihna nasa tak nei ni mahse, haichhuah loh a la ni a, inkalpawhna kawngpui a that tawklloh avangin bultan harsa deuh mahse sawrkar chu pui turin a inhawng reng a ti a, India ram state dang leh India ram pawn lama MSME te chu Mizorama lo kal a, industry lo din a, tualchung mi MSME te leh sawrkar nena thawkho turin a sawm a ni.

Vawiin conference hi Session hniha then a ni a. Technical session-ah hian Power point presentation hmangin Taiwan lama mithiam ten sumdawna bultan dan leh thil pawimawh hrang hrang kalkhawmte Thupui thlan bik hmangin an hrih a, Mizoram chhung leh pawn lama kutkawih eizawna

bultan te bakah, hetiang lama tui zirlai naupang MZU leh College hrang hrang 5 atangin an tel a ni.

<><><>

BEST TOURISM VILLAGE

Sawrkar laipuaia Ministry of Tourism in World Tourism Day puala a buatsaih 'Best Tourism Village Competition 2024' ah Sialsuk khua chuan intihsiakna 5 zinga pakhat "Community Based Tourism" ah Best Tourism Village lawmman a la.

Vawiina World Tourism Day lawmna New Delhi a neihah Vice President Jagdeep Dhankhar leh Union Tourism Minister Gajendra Singh Shekhawat te chuan lawmman hi an hlan a, Bialtu MLA Pi Baryl Vanneihsangti Tlau leh Mizoram Tourism Secretary Dr. Lalrozama ten Sialsuk khaw aiawhin an dawng a ni. He intihsiakna ah hian State 30 atangin khaw 991 an inlan a, chung khaw 991 te chu category hrang hrang pariat (8) ah thliar leh niin chuta tang chuan khaw 36 te chu lawmman la tura thlan chhuah leh an ni.

Sialsuk khua ah hian mi cheng 2370 awmin, chhungkaw 27 in tourism kaihnawihin ei an zawng a ni. Tourism atanga sum lut za a sawm hi an khaw Health Care tih changtlun nan an hmang thin a ni. Sialsuk ah hian homestay 10 awmin khum 30 a awm a, kum khat chhungin mi 15000 atanga 20000 vel in Sialsuk hi an tlawh thin anga chhut a ni. Siaksuk Village Council kaihhruaina in Sialsuk Tlang Committee (Sialsuk Ecotourism Development Committee) din a ni a, anni hian tourism tih hmasawna tur kawng hrang hrang an dap thin a ni.

Best Tourism Village Competition hi kum 2023 atang khan Ministry of Tourism hian World Tourism Day pualin a buatsaih tan a, a hmasa ber atan Reiek khua in Best Tourism Village an lo la tawh bawk a ni.

<><><>

PB-SHABD

Thuthar thehdarhtute pawl hrang hrang ten a thlawna chanchinthar, thuziak leh thlalak bakah video an lakchhawn theihna tura duan PB-SHABD chungchang vawiin khan AIR leh DDK thawkten sawi fiah.

Vawiina Aizawl Press Club-a hun hmanah hian AIR leh DDK Copy Editor – Isaac Zoramsanga, Lawmsangkimi leh Lalrinfeli ten PB SHABD chungchang MJA member te hnenah an sawi a, ramchhunga thuthar hrang hrang a thlawna an neih theih dan sawiin heng thuthar hrang hrang bakah video leh thlalak te a thlawna lakchhawn theih ani dawn tih an sawi.

PB-SHABD hi kumin March 13 atanga hman tan niin, Media pawl hrang hrangte hnena nitin chanchinthar, thuziak, thlalak leh video hmanga pekna tura ruahman a ni a. Heta tanga news lak reng rengte chu logo awm lo a nih dawn bakah mahni ta anga an hman theih tura ruahman a ni.

PB-SHABD ah hian nitin ramchhunga thuthar 1000 chuang dahchhuah thin niin Mizo tawng tiamin India rama tawng chi hrang hrang hmangin Regional News Unit (RNU), DDK & Akashvani kaltlanga dahchhuah thin a ni.

<><><>

SWACHHATA HI SEVA

Swachhata Hi Seva puala faina beihpui kalpui mekah sawrkar pisa leh zirna in hrang hrangah Faina hnatlang neih mek a ni a, Vawiin khan District hrang hrangah pawl leh sawrkar department hrang hrangin an pisa leh a chhehvel ti faiin an hnatlang.

Swachhata Hi Seva hnuaiyah hian Mizoram pum huapin Faina kawnga hmalakna tur hrang hrang 2052 khawpui leh thingtlangah te ruahman a ni a. Cleanliness Target Units bawlhhlawh chhek khawm tam zualna 398 thlanchhuah niin, heng zinga 262 hi tihfai tawh a ni. Swachhata Hi Seva Campaign hi September ni 17 atanga kalpui tan niin, October ni 2 a khar tur a ni. Faina Hapta hi September ni 23-a tan niin, October ni 2-ah a kharna hun District zawng zawngah hman a ni ang.

India Hnampa Mahatma Gandhi pian champha leh Swachh Bharat Mission kum 10 tlin lawmna pualin October ni 2 hi Swachhta Diwas (Faina Ni) atan hman tur a ni a. Aizawl-ah a lawmna pui ber hi UD&PA Department leh PHED tangkawpin an buatsaih dawn a ni. Swachhata Hi Seva Campaign chhunga inelna hrang hrang buatsaih lawmman semna neih a ni nghal dawn a ni.

<><><>

EK PED MAE KE NAAM

Rampuma thingphun beihpui Ek Ped Mae Ke Naam-ah thing tiak vaibelchhe 80 chuang phun tawh a ni. Union Ministry of Environment, Forest and Climate Change chuan thing tiak vaibelchhe 80 phun tlin tuma beihpui a thlak chu tihhlawhtlin a ni a. Union Ministry sawidanin tun thla ni 25 khan he an bituk zat hi khum a ni a. A hun aia ni ngaa hmain an ti hlawhtling thei a ni. Union Ministry chuan sawrkar hnuaiyah thawktu hrang hrangte, tualchhung mipuite leh midang he beihpui hlawhtlinna tura inhnamhnawih zawng zawngte chungah lawmthu a sawi a. Ek Ped Mae Ke Naam hi ramchhunga ngaw hmun siam belh zel tura hmalakna niin Uttar Pradesh chu thingtiak phun hnem ber niin vaibelchhe 26 an phun tling a ni. Ek Ped Mae Ke Naam campaign hi kumin June ni 5 khan Prime Minister Narendra Modia chuan New Delhi-a World Environment Day hmannaah a hawng a. Prime Minister hian thingtiak phunin bul a tan a ni.

<><><>

VICE PRESIDENT ON WORLD TOURISM

Vice President Jagdeep Dhankar chuan Tourism chuan mihringte min thlunzawm a ni a ti. Vawiina New Delhi-a World Tourism Day hmannaah he

thu hi sawiin Pu Dhankar-a chuan tourism chuan remna a awm theih nan a thawhhlawk hle a ti a. Khawvel pum hian remna an duh a. Khawi hmunah pawh inngirngghona thleng se khawvel lehlam thlengin nghawng a nei a, mipui nitin mamawh kal dan pawh a ti khaih lak vek a ni a ti a. Kumina Tourism Day thupui Tourism leh remna tih chu tunlai khawvel thlirin a pawimawh em em a ni a ti bawk. Vice President chuan World Tourism Day chu khawvel eibar hmasawnnate, khawtlang hmasawna leh nunphung inhrilhtawna kawngah tourism that zia inhrilhtharna ni a ni a ti bawk..

<><><>

PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmang leh dawn a. Mizo tawnga lehlinin a zui ang. Tun tum ami hi episode 114-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestream a ni ang.

<><><>